



Broj/ Број : 02/2-50-1-9-21-11/04
Sarajevo/ Сарајево : 19. 07. 2004.

Z A P I S N I K

sa 21. sjednice Komisije za vanjsku i trgovinsku politiku Doma naroda Parlamentarne skupštine BiH održane 14. 07. 2004. godine

Dvadesetprvu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali svi članovi Komisije: Hasan Čengić, Anto Spajić, Vinko Radovanović, Osman Brka, Velimir Jukić i Nade Radović, kao i Nevenka Savić, sekretar Komisije.

Osim navedenih, sjednici su, u svojstvu predstavnika predlagača, prisustvovali: Osman Topčagić, direktor i Svjetlana Đokić, stručni saradnik iz Direkcije za evropske integracije; Nedžad Hadžimusić, ambasador, šef Odjela za političku multilateralu u Ministarstvu vanjskih poslova; Zdravko Šavija, savjetnik ministra iz Ministarstva komunikacija i transporta.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio Dnevni red:

DNEVNI RED

1. Usvajanje Zapisnika sa 20. sjednice Komisije;
2. Sedmi kvartalni izvještaj generalnog sekretara Vijeća Evrope o postprijetnim aktivnostima Bosne i Hercegovine u periodu mart – maj 2004. godine;
3. Realizacija prioriteta iz Izvještaja Evropske komisije Vijeću ministara Evropske unije o izvodljivosti pregovaranja između Bosne i Hercegovine i Evropske unije o Sporazumu o stabilizaciji i pridruživanju;
4. Saglasnost za ratifikaciju Sporazuma između Bosne i Hercegovine i Republike Bugarske o slobodnoj trgovini – predlagač Predsjedništvo BiH;
5. Saglasnost za ratifikaciju Evropske konvencije o prekograničnoj televiziji (ETS 132), otvorena za potpisivanje 5. maja 1989. godine u Strazburu, sa Protokolom o izmjenama

Evropske konvencije o prekograničnoj televiziji, otvorenim za prihvatanje 1. oktobra 1998. godine - predlagač Predsjedništvo BiH

6. Saglasnost za ratifikaciju Konvencije za osnivanje evropske i mediteranske Organizacije za zaštitu biljaka (EPPA) od 18. aprila 1951. godine, sa dopunama Vijeća od 27. aprila 1995. godine, 9. maja 1962. godine, 18. septembra 1968. godine, 19. septembra 1973. godine, 23. septembra 1982. godine, 21. septembra 1988. godine i 15. septembra 1999. godine - predlagač Predsjedništvo BiH;
7. Izvještaj sa učešća na završnoj Konferenciji "Konflikti: sprečavanje, rješavanje, pomirenje"; Forum Barselona 2004., koja je održana od 16. – 20. juna 2004. godine u Barseloni;
8. Izvještaj o radu Komisije za vanjsku i trgovinsku politiku za period 28. decembar 2003. godine – 18. juna 2004. godine;
9. Tekuća pitanja.

Dnevni red je jednoglasno usvojen.

Ad. 1. Usvajanje Zapisnika sa 20. sjednice Komisije

Zapisnik sa 20. sjednice Komisije je jednoglasno usvojen.

Ad. 2. Sedmi kvartalni izvještaj generalnog sekretara Vijeća Evrope o postprijemnim aktivnostima Bosne i Hercegovine u periodu mart – maj 2004. godine

O Izvještaju je govorio ambasador Hadžimusić. On je objasnio da se radi o redovnom izvještaju, a period koji pokriva poklapa se dvogodišnjicom pristupanja Bosne i Hercegovine Vijeću Evrope, te je s tog stanovišta interesantno razmotriti ispunjenje obaveza Bosne i Hercegovine. Ambasador Hadžimusić je naglasio da su obaveze koje proizilaze iz punopravnog članstva u Vijeću Evrope konvergentne sa obavezama Bosne i Hercegovine kao zemlje kandidata za pristupanje Evropskoj uniji i programu Partnerstvo za mir. U diskusiji je konstatirano da ne postoje opravdani razlozi za kašnjenje sa ratificiranjem konvencija i povelja koje se spominju u Izvještaju. Poseban problem predstavlja implementacija već potpisanih i ratificiranih dokumenata.

Članovi Komisije su na kraju diskusije jednoglasno usvojili sljedeće zaključke koje upućuju Kolegiju Doma naroda na razmatranje:

- Traži se od nadležnih institucija: Predsjedništva BiH, Vijeća ministara BiH, Ministarstva vanjskih poslova i Parlamentarne skupštine BiH da ubrzaju aktivnosti na ratifikaciji konvencija i povelja koje se spominju u Izvještaju;
- Traži se od Vijeća ministara BiH i drugih nadležnih organa da ubrzaju reforme, tj. da predlože, donesu i implementiraju zakone, konvencije i povelje, posebno u oblasti ljudskih prava, vladavine prava, reforme vlasništva, kao i da ubrzaju proces integracije u evropske strukture bez potrebe za "stalnim pritiskom međunarodne zajednice";

- Komisija za vanjsku i trgovinsku politiku će u oktobru 2004. godine održati posebnu tematsku sjednicu o stepenu realiziranja postprijemnih obaveza Bosne i Hercegovine prema Vijeću Evrope i prioriteta iz Izvještaja Evropske komisije Vijeću ministara Evropske unije o izvodljivosti pregovaranja između Bosne i Hercegovine i Evropske unije o Sporazumu o stabilizaciji i pridruživanju.

Ad. 3. Realizacija prioriteta iz Izvještaja Evropske komisije Vijeću ministara Evropske unije o izvodljivosti pregovaranja između Bosne i Hercegovine i Evropske unije o Sporazumu o stabilizaciji i pridruživanju

O realizaciji prioriteta govorio je g. Topčagić, direktor Direkcije za evropske integracije koja je nadležna za njihovo praćenje. On je istakao da je obaveza Bosne i Hercegovine usvajanje 40 zakona, uspostavljanje 27 institucija na državnom nivou i 5 na entitetskom. Do sada je Vijeće ministara utvrdilo 36 prijedloga zakona, od toga 34 su upućena u parlamentarnu proceduru. Planirano je da preostala 4 prijedloga zakona budu razmatrana na sjednici Vijeća ministara BiH zakazanoj za 15. 07. 2004. godine. Time bi obaveze Vijeća ministara BiH, u smislu utvrđivanja prijedloga zakona bile završene. G. Topčagić je istakao da bi bilo od izuzetnog značaja da se zakoni koji se nalaze u parlamentarnoj proceduri i usvoje, jer je namjera organa vlasti BiH da iskoriste dobru volju i pozitivan odnos sadašnjeg sastava Evropske komisije (čiji mandat ističe krajem oktobra) da daju prijedlog za otpočinjanje pregovora između BiH i Evropske unije o Sporazumu o stabilizaciji i pridruživanju. Direktor Topčagić je rekao da Direkcija za evropske integracije priprema izvještaj o postignutom napretku koji će biti uručen g. Krisu Patenu prilikom otvaranja Starog mosta u Mostaru 23. 07. 2004. godine. Razgovaralo se i o implementaciji zakona, kao i o potrebnim budžetskim sredstvima u kontekstu značajnog napretka u 16 prioriteta iz P16, a koju je Vijeće ministara uputilo Odboru za ekonomiju Vijeća ministara BiH na razmatranje.

Nakon rasprave, članovi komisije su jednoglasno usvojili sljedeće zaključke koje upućuju Kolegiju Doma naroda na razmatranje:

- Sugerira se kolegijima domova Parlamentarne skupštine BiH da, u skladu sa svojim nadležnostima, preduzmu sve potrebne mjere da se do kraja septembra 2004. godine usvoji paket zakona koji predstavljaju preduslov za otpočinjanje pregovora o Sporazumu o stabilizaciji i pridruživanju, a od nadležnih organa Bosne i Hercegovine se traži da učine napore radi implementacije obaveza u vezi sa Sporazumom;
- Traži se od Vijeća ministara BiH da što prije pripremi rebalans budžeta kojim će se omogućiti uspostavljanje i rad novih državnih institucija.

Ad. 4. Saglasnost za ratifikaciju Sporazuma između Bosne i Hercegovine i Republike Bugarske o slobodnoj trgovini – predlagač Predsjedništvo BiH

Predsjedavajući je konstatirao da predstavnik predlagača nije prisutan. Predsjedavajući g. Čengić je ukratko govorio o odredbama Sporazuma i naglasio da je ovo jedan od bilateralnih sporazuma koji je Bosna i Hercegovina bila u obavezi da potpiše sa zemljama regiona jugoistočne Evrope, kao potpisnica Memoranduma o razumjevanju Pakta stabilnosti.

Nakon toga, članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 5. Saglasnost za ratifikaciju Evropske konvencije o prekograničnoj televiziji (ETS 132), otvorena za potpisivanje 5. maja 1989. godine u Strazburu, sa Protokolom o izmjenama Evropske konvencije o prekograničnoj televiziji, otvorenim za prihvatanje 1. oktobra 1998. godine - predlagač Predsjedništvo BiH

U svojstvu predstavnika predlagača, o Konvenciji i Protokolu je govorio g. Šavija. Članovi Komisije imali su više pitanja, koja su se odnosila na pravne, propagandne i tehničke aspekte implementacije Konvencije. Značajno je istaći da će realizaciju Konvencije pratiti Regulatorna agencija za komunikacije BiH. G. Šavija je, sa stručnog stanovišta, iznio prijedlog da se Regulatornoj agenciji za komunikacije odobri korištenje sredstava sa kojima već raspolaže za nabavku opreme za monitoring.

Nakon diskusije, članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Konvencije i Protokola.

Ad. 6. Saglasnost za ratifikaciju Konvencije za osnivanje evropske i mediteranske Organizacije za zaštitu biljaka (EPPO) od 18. aprila 1951. godine, sa dopunama Vijeća od 27. aprila 1995. godine, 9. maja 1962. godine, 18. septembra 1968. godine, 19. septembra 1973. godine, 23. septembra 1982. godine, 21. septembra 1988. godine i 15. septembra 1999. godine - predlagač Predsjedništvo BiH

Konstatirano je da nije prisutan predstavnik predlagača. Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Konvencije.

Ad. 7. Izvještaj sa učešća na završnoj Konferenciji “Konflikti: sprečavanje, rješavanje, pomirenje”; Forum Barselona 2004., koja je održana od 16. – 20. juna 2004. godine u Barseloni

Članovi Komisije su Izvještaj primili k znanju.

Ad. 8. Izvještaj o radu Komisije za vanjsku i trgovinsku politiku za period 28. decembar 2003. godine – 18. juna 2004. godine

O sadržaju Izvještaja govorio je predsjedavajući, g. Čengić. Primjedbi na Izvještaj nije bilo. Članovi Komisije su jednoglasno usvojili Izvještaj o radu i, u skladu sa članom 25. stav 3., uputili ga Domu naroda na razmatranje.

Ad. 9. Tekuća pitanja

Rasprava nije vođena.

Predsjedavajući Komisije

Hasan Čengić